

15 JUL 1996

DR MAHATHIR BERLEPAS KE ASIA TENGAH

KUALA LUMPUR, 15 Julai (Bernama) -- Perdana Menteri Datuk Seri Dr Mahathir Mohamad hari ini berlepas dari sini untuk mengadakan lawatan rasmi ke Republik Kyrgyz dan Republik Kazakhstan di Asia Tengah untuk meningkatkan hubungan dua hala.

Dr Mahathir yang diiringi isterinya, Datin Seri Dr Siti Hasmah Mohd Ali, akan berada di Republik Kyrgyz mulai hari ini sehingga Khamis, diikuti lawatan ke Kazakhstan sehingga Sabtu.

Delegasi Perdana Menteri termasuk lima menteri kabinet -- Menteri luar Datuk Abdullah Ahmad Badawi, Menteri Kerja Raya Datuk Seri S.Samy Vellu, Menteri Perusahaan Utama Datuk Seri Dr Lim Keng Yaik, Menteri Kebudayaan, Keseniaan dan Pelancongan Datuk Sabbaruddin Chik dan Menteri di Jabatan Perdana Menteri Datuk Dr Abdul Hamid Othman.

Turut dalam delegasi itu tiga Menteri Besar -- Tan Sri Wan Mokhtar Ahmad dari Terengganu, Datuk Abdul Ghani Othman (Johor) dan Datuk Seri Shahidan Kassim (Perlis) -- serta Ketua Menteri Melaka Datuk Seri Mohd Zin Abdul Ghani.

Delegasi perniagaan dengan 81 anggota yang diketuai Pengerusi dan Ketua Eksekutif Penerbangan Malaysia Tan Sri Tajudin Ramli turut mengiringi Dr Mahathir ke kedua-dua negara.

Lawatan Perdana Menteri ke kedua-dua negara itu sebagai memenuhi jemputan Presiden Kyrgyz Askar Akayev yang mengadakan lawatan rasmi ke negara ini pada Julai tahun lepas dan Presiden Kazakhstan Nursultan Nazarbayev yang melawat Malaysia pada Mei lepas.

Lawatan itu merupakan yang pertama oleh seorang Perdana Menteri Malaysia ke kedua-dua negara itu. -- BERNAMA

AZZ WE NMO